

Hues a ordena pa paga mas di 12 miyon florin

Hospital a gana su caso contra AZV

ORANJESTAD – Ayera mainta Hues a ordena Uitvoeringsorgaan Algemene Ziektekostenverzekering (AZV) pa paga hospital como un adelanto, 5.8 miyon florin cu ta pa cubri e debe di 2004 y ademas Hues a ordena AZV pa paga hospital tur luna 7 miyon florin. E decision aki a cay manera un baño di awa frieu pa AZV ya cu Hues a rechasa e demanda di AZV pa laga Gobierno para responsabel pa esaki.

CASO SUMARIO

E motibo cu Hospital a cuminsa e caso sumario contra AZV ta pasobra cu ainda Hospital no a ricibi pago completo di 2004, corda di e lunanan di 2005.

Abogado mr. Kloes cu a representa Hospital a mostra cu dia 16 di Juli 2003, Corte a ordena AZV entre otro pa desde Januari 2003 tur luna paga maximo 6.4 miyon florin na Stichting Ziek-enverpleging Aruba cu ta e fundacion cu ta maneha Hospital.

Partidonan a reuni pa fiha e adelanto di tur luna pa 2004 pero no por a yega na un acuerdo. AZV a fiha e pago mensual na 6.5 miyon florin durante 2004.

Hospital a manda e cuenta final di 2004 pa AZV cu ta algo mas di 6 miyon florin. AZV ta reconoce cu e tin cu paga algo mas cu 4.6 miyon florin pero no e suma cu hospital ta pretende.

Partidonan a reuni pa fiha riba e suma cu hospital lo mester haya pa luna durante 2005. Nan ta diferencia di opinion riba e subsidio di AZV. AZV a expresa di ta dispuesto pa paga entre 6.6 y 6.7 miyon florin pa luna mientras cu Hospital a fiha minimo 7.3 miyon florin.

Gobierno a laga sa den su carta fecha 17 di September 2004 cu no por aumenta e subsidio pasobra e situacion financiero di Gobierno no ta permiti esaki. AZV a manda pidi Gobierno dia 10 di Februari 2005, 22.6 miyon florin pa cubri 2004 pero

Gobierno solamente a paga 12.5 miyon florin.

DEMANDA

Hospital ta demanda un adelanto di mas cu 6 miyon florin cu ta pa cubri e debe di 2004 y un adelanto di 7.3 miyon pa luna cual mester wordo paga dentro di 30 dia despues cu e cuentanan keda entrega. E ta exige un daño per huicio di 10 mil florin pa cada dia of parti di un dia cu AZV keda sin cumpli cu esaki.

REACCION

Abogado mr. Brown cu a representa AZV a mostra cu Hospital tabata hopi negligente despues di e sentencia di 16 di Juni 2003 ya cu no a tuma medidanan pa reduci e gastonan. El a señala como ehempel e problema di cama, sacamento di foto rayos X. El a señala cu Hospital no a tuma ningun medida pa realmente baha e gastonan pa 2005. Hospital ta calcula cu pa 2005 e lo mester haya 90 miyon florin.

SENTENCIA

Hues den su evaluacion di e caso a mostra cu lo fiha 7 miyon florin cu Hospital lo mester haya pa luna, cual ta un aumento di 10 % compara cu e pago cu AZV a haci na hospital na 2003. Hues a sigui bisa cu e decision aki lo haci cu lo tin un reduccion den e presupuesto di 2005.

Hues a ordena AZV pa paga hospital un adelanto riba e cuenta di 2004 di 5.8 miyon florin y multiplica esaki cu e interes correspondiente di Februari 2005.

Tambe Hues a ordena AZV pa paga hospital tur luna 7 miyon florin y pa paga Hospital no mas laat cu 90 dia despues cu e cuentanan wordo entrega. Hues a fiha un daño per huicio di 10 mil florin pa cada dia of parti di dia cu AZV keda sin cumpli cu esaki.

E parti cu AZV a pidi pa pone Gobierno responsabel pa esaki, a wordo rechasa.